

KANTON SARAJEVO

Skupština Kantona

Na osnovu člana III.4. Ustava Federacije Bosne i Hercegovine i člana 18b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01 i 28/04), Skupština Kantona Sarajevo, na sjednici održanoj 24. jula 2008. godine, donijela je

ZAKON

O PROGLAŠAVANJU ŽALOSTI U KANTONU SARAJEVO

Član 1. (Sadržaj Zakona)

Ovim Zakonom propisuju se uslovi za proglašenje žalosti i postupak proglašenja žalosti, vrijeme trajanja i način izražavanja žalosti u Kantonu Sarajevo (u daljnjem tekstu: Kanton).

Član 2. (Razlozi za proglašenje žalosti)

- (1) Žalost se proglašava povodom velikog broja ljudskih žrtava, nastalih uslijed elementarnih nepogoda izuzetnih razmjera (zemljotres, poplava, požar, klizanje tla i sl.), uslijed saobraćajnih nesreća i teških nesreća u preduzećima, školama i drugim javnim objektima i na javnim mjestima, kao i uslijed drugih događaja koji su, po ocjeni Vlade Kantona (u daljnjem tekstu: Vlada), takve prirode i takvih razmjera da se može smatrati da su zadesili cijeli Kanton.
- (2) Žalost se proglašava i povodom smrti istaknutih, društveno priznatih ličnosti.
- (3) Vlada utvrđuje bliže kriterije za proglašenje žalosti u Kantonu, u slučaju smrti istaknutih, društveno priznatih ličnosti, uz saglasnost Komisije za obilježavanje, čuvanje i njegovanje historijskih događaja i ličnosti Skupštine Kantona Sarajevo.

Član 3. (Proglašenje žalosti)

Žalost proglašava Vlada, uz saglasnost predsjedavajućeg i zamjenika predsjedavajućeg Skupštine Kantona.

Član 4. (Trajanje žalosti)

Žalost u Kantonu traje najmanje jedan dan.

Član 5. (Sadržaj odluke o proglašenju žalosti)

- (1) Odluka Vlade o proglašenju žalosti u Kantonu sadrži:
 - a) obavještenje o događaju zbog kojeg se proglašava žalost;
 - b) vrijeme trajanja, odnosno datum žalosti i
 - c) način izražavanja žalosti.
- (2) Odluka iz stava (1) ovog člana objavljuje se u sredstvima javnog informisanja.

Član 6.
(Izražavanje žalosti)

(1) Žalost se izražava isticanjem zastave Kantona na pola koplja, u skladu sa Zakonom o upotrebi grba i zastave Kantona Sarajevo ("Službene novine Kantona Sarajevo", br. 9/99 i 16/03), minutom šutnje na radnim i drugim skupovima, održavanjem komemorativnih sjednica, upisivanjem u knjigu žalosti, kao i drugim načinom izražavanja žalosti, prikladnim za određeni događaj, povodom koga se proglašava žalost.

(2) U slučaju proglašenja žalosti, odlažu se javne manifestacije zabavno-humorističkog karaktera za vrijeme trajanja žalosti.

Član 7.
(Pojam javnih manifestacija)

Pod javnim manifestacijama u smislu stava (2) člana 6. ovog zakona, podrazumijevaju se pojedine predstave u pozorištima i kinima, sportskim takmičenjima, priredbe na drugim javnim mjestima, kao i emisije na Televiziji Kantona Sarajevo i lokalnom radiju i televiziji, koje po svojoj prirodi nisu primjerene žalosti.

Član 8.

Dosadašnje odluke o proglašavanju Dana žalosti, koje je donijela Skupština Kantona Sarajevo, ostaju na snazi.

Član 9.
(Kazne za prekršaj)

(1) Novčanom kaznom u iznosu od 1.000,00 do 3.000,00 KM, kaznit će se za prekršaj pravno lice koje postupi suprotno odredbama člana 6. ovog Zakona.

(2) Za prekršaj iz stava (1) ovog člana, kaznit će se odgovorno lice u pravnom licu i fizičko lice, novčanom kaznom u iznosu od 100,00 do 1.000,00 KM.

Član 10.
(Nadzor)

Nadzor nad provođenjem ovog Zakona vrši Ministarstvo pravde i uprave Kantona, putem upravne inspekcije.

Član 11.
(Stupanje na snagu)

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-23721/08
24. jula 2008. godine
Sarajevo

Predsjedavajući
Skupštine Kantona Sarajevo
dr. Denis Zvizdić, s. r.